

Minister Andin Bikker

Academia di Ley ta bay bira un realidad

ORANJESTAD (AAN): Minister di Husticia Andin Bikker Diahuebs durante un conferencia di prensa a bisa cu e Academia di Ley ta bay bira un realidad.

"Diahuebs ultimo mi tabata na Corsow, caminda mi a presencia apertura di Caribbean Center for Legislation y instalacion di un profesor di Legislation Sjoerd Zijlstra".

"Durante e apertura aki mi a haya amplio reconocimiento pa mi esfuerzonan for di 2014 bin ariba, tempo cu mi tabata den Parlamento, pa yega na un academia di ley pa Aruba".

E mandatario a splica pa kico e ta haya cu ta asina importante pa bin cu un academia di ley.

"Nos leynan di constitucion, tratadonan, ordenanzanan, decretonan te cu Ministeriele Beschikking basicamente ta e software di nos pais".

"Si bo mester ehecuta un acuerdo di gobernacion of si bo ripara cu tin cierto cambio den nos sociedad cu ta rekeri cambianan den ley, bo mester di loke nos ta yama wetgevingscapaciteit, esta capacidad di personanan cu ta versa y educa den e arte di traha leynan".

"Esey ta algo sumamente importante, pasobra e ta determina con lihe bo por goberna".

Esaki segun e minister, kende a sigui bisa cu Aruba tin leynan sumamente anticua.

E mandatario a duna un ehempel unda cu el a indica cu algun luna pasa a cambia e ley cu yama landsverordening op notarisambt cu ta di añanan 18 y algo.

"Asina mi por menciona diferente ley, incluyendo leynan cu ta data di 1908 y e esfuerzo ta pa nos yega na moderniza nos leynan".

Bikker a indica cu esaki ta

parti di acuerdo di gobernacion y parti di e presupuesto nan cu Parlamento a aproba.

"Na Corsow rñf a haci un proposicion na e iniciador nan di e Caribbean Center for Legislation, pa nos habri un Aruba Desk".

"Esaki ta bay encera nos ta bay duna e oportunidad pa na hendenan cu kier sifa e arte di traha conceptionan di ley".

"Nos tin un grupo grandi y nos ta calcula cu nos por cuminsa cu 15 pa 20 persona cu kier educa nan mes riba e specialismo aki".

"Los di esey nos tin facilidadnan, unda cu nos ta buscando cooperacion cu Universidad di Aruba, mientras cu hendenan ta bay por sigui cursonan online".

Segun Bikker asina lo por yega na aumenta e capacidad di personanan cu por yuda nos traha conceptionan di ley y asina moderna e legislacion di Aruba.

E mandatario a anuncia cu den e cuadro aki cu cooperacion di Parlamento, otro siman lo cuminsa trata diferente concepto di ley cu tabata tin pendiente pa decadan.

Ta bay trata entre otro e cambianan di Codice Civil cu ta pendiente di 2016.

"Ta hopi importante pa cambia nos leynan, pasobra nos tin 1 corte comun cu nos ta comparti cu Corsow, St. Maarten y e islanan BES y ta hopi trabao si cada biaha corte comun mester bay wak ta con algo ta reglamenta na Aruba, caminda cu Corsow y St. Maarten a update nan leynan por ehempel di Codice Civil", segun e mandatario, kende a indica cu lo haci cambianan tambe den e Codice Corporativo.

"Ta bay cambia e asina yama Wetboek van Koophandel, cu segun mi ta data di Segunda Guerra Mundial", segun e minister.

